

Script of Morning Gojri News Bulletin 23 October 2024 at 1015Hrs

ما رنینگ گو جری نیوز بلیٹن مو رخہ 23 اکتوبر 2024

یوہ آکا شوانی جموں ہے عبید الرحمن تیں خبر سُنو۔

PM XI Jinping

وزیر اعظم نریندر مو دی اج روس غا کزان مانہ بریکس اجلاس غے دوران چین غا صدر شی جن پینگ نال سفارتی سطح غی گل بات کریں گا۔ اصل قبضہ لکیر ور دوہاں ملکاں بشکار ہوا اک معاہدہ تیں بعد یاه اک اہم میٹنگ ہے۔ اور گذشتہ 5 سال مانہ پہلی بار بھارت غا وزیر اعظم تے چین غا صدر بشکار یاه میٹنگ ہو رہی ہے۔ اس تیں پہلاں جناب مو دی روس تے ایران غا صدور نال وی ملاقات کر چکا ہیں جس مانہ کئی معاملات ور امن معاہداں ور گل بات ہوئی ہے۔ روسی صدر پُتن نال ملاقات غے دوران جناب مو دی نے کہیو کہ روس، یوکرین بشکار امن معاہدہ واسطے بھارت مدد کرن نانہ تیار ہے۔ بھارت غا خارجہ سیکریٹری وکرم مصری نے کہیو ہے کہ جناب مو دی نے صدر پُتن نانہ یوکرین غا اعلیٰ عہدیداراں نال اپنا تعلقات بارے دسیو ہے اور کہیو ہے کہ بھارت دوہاں ملکاں بشکار امن معاہدہ مانہ اہم کردار ادا کرن واسطے تیار ہے۔ فوج غا چیف جنرل اُپندرہ دویویدی نے کہیو ہے کہ بھارت مشرقی لداخ مانہ اپریل 2020 غا قرار نامہ تے دہلی غی طرفوں بیجنگ نال گذشتہ 4 سال غی کشیدگی نانہ ختم کرن واسطے ہوا معاہدہ تیں بعد فوج غا جنرل نے کہیو ہے کہ بھارتیہ فوجی جوان سرحد ور آپسی طور اک دوجا ور یقین بحال کرن غی کوشش کر رہیا ہیں۔

India Pak Kartarpur

بھارت تے پاکستان نے شری کرتار پور صاحب راہ داری ور ہوا معاہدہ نانہ مزید 5 سال غی توسیع دین ور رضامندی ظاہر کی ہے۔ اس معاہدہ ور 24 اکتوبر 2019 غے روز دستخط ہوا تھا۔ جس مانہ گردوارہ دربار صاحب کرتار پور نروال پاکستان تیں عقیدت منداں واسطے رواہ داری کھولی گئی تھی۔ جس غی مدت 5 سال تھی۔ خارجہ امور غی وزارت نے اک بیان مانہ دسیو ہے کہ اس معاہدہ غی 5 سال واسطے توسیع نال ہُن بھارت تیں عقیدت مند پاکستان مانہ قائم گردوارہ غو دور کر سکیں گا۔

LG Sinha

جموں کشمیر غا لیفٹنٹ گورنر منوج سنہا نے گذشتہ روز سرینگر مانہ نو مبر مہینہ غی 4 تاریخ واسطے قانون ساز اسمبلی غو اجلاس بلايو ہے۔ جموں کشمیر قانون ساز اسمبلی غا نواں منتخب ہوا ممبران نے گذشتہ سومواریں جناب مبارک گل غا عارضی طور ور اسمبلی اسپیکر منتخب ہون تیں بعد حلف لیو تھو۔ راج بھون سرینگر غا اک نمائندہ نے خبر دتی ہے کہ لیفٹنٹ گورنر 4 نومبر نانہ اسمبلی نال خطاب کریں گا۔ اور اسے دن اسپیکر غا عہدہ واسطے انتخابات وی ویں گا۔ اس تیں پہلاں لیفٹنٹ گورنر نے گوانڈی مُلک در اشارو کرتاں واں کہیو تھو کہ وے جموں کشمیر مانہ جمہوری نظام تیں کافی پریشان ہیں اور اس عمل مانہ خلل پیدا کر رہیا ہیں۔ لیکن مہا را حفاظتی دستہ دہشت گرد حملوں غو سود سمیت بدلو لیں گا، جموں یونیورسٹی مانہ اک پروگرام گے دوران لیفٹنٹ گورنر نے کہیو کہ ہُن جموں کشمیر مانہ منتخب سرکار قائم ہو چکی ہے۔ لیکن گوانڈی مُلک نانہ یاه گل پسند نہیں ہے۔ اُن نے کہیو کہ جموں کشمیر ہُن دہشت نہیں بلکہ سیاحت غی وجہ نال اپنی

الگ پشان رکھے۔ موصوف نے کہیو کہ جموں کشمیر مانہ شفاف طریقہ نال انتخابات تیں بعد بھارتیہ آئین غے تحت سرکار وجود مانہ آئی ہے۔

CM Power

وزیر اعلیٰ عمر عبداللہ نے گذشتہ روز پی ڈی ڈی محکمہ نانہ ہدایت جاری کی ہیں کہ وے سردی غا موسم مانہ بجلی سپلائی نانہ بغیر کٹوتی تیں یقینی بناویں۔ سردیاں غا موسم تیں پہلاں وزیر اعلیٰ نے پی ڈی ڈی محکمہ غی میٹنگ طلب کر غے سخت احکام جاری کیا اور کہیو کہ متعلقہ محکموں سردیاں تیں پہلاں ہی اپنی تمام تیاری مکمل رکھے۔ موصوف نے کہیو کہ بجلی سپلائی تے کٹوتی غا ضابطاں نانہ شفاف رکھیو جائے اور اس ضمن مانہ کسے وی سیاسی یاہ باہری طاقتاں گو اثر رسوخ نہیں ہونو چاہیے۔

Minister Darbar Move

وزیر اعلیٰ عمر عبداللہ غی کا بینہ غا وزیر ستیش شرما نے گذشتہ روز کہیو ہے کہ سرکار دربار موو غی روایت نانہ بحال کرن ور کم کر رہی ہے۔ جموں مانہ دربار منتقلی نہ ہون نال تجارت ور منفی اثر ہوو۔ اُن نے کہیو کہ جموں مانہ دربار منتقلی غی ضرورت ہے کیونجے جموں غا تجارتی شعبہ غو اس نال براہ راست تعلق ہے۔ جموں کشمیر سائنس کانگریس 2024 غا اختتام ور وزیر موصوف نے دسیو کہ جموں کشمیر مانہ مرحلہ وار راشن غی مقدار بدھائی جائے گی جھپڑی جے عوام غی ضرورت غے مطابق خود بخود ڈگنی ہو جائے گی۔

Pooja Holidays

دائریکٹر اسکولی تعلیم جموں غی طرفوں جاری اک حکم نامہ مانہ دسیو گیو ہے کہ خطہ جموں غا ہائر سکینڈری سطح تک غا تمام تعلیمی اداراں مانہ 29 اکتوبر 2024 تیں 2 نومبر 2024 تک دیوالی غی چھٹی رہیں گی۔

ADGP Jammu

پولیس غا ایڈیشنل ڈائریکٹر جنرل آنند جین نے گذشتہ روز جموں زون مانہ تعینات فوج غی نجی تیاریاں غو اک میٹنگ غے دوران جائزہ لیو۔ اس دوران بہترین لائحہ عمل تیار کرن تے دیگر اداراں نال تال میل غے نال معلومات سانجھا کرن تے سانجھا کامیاب آپریشن کرن ور تبادلہ خیال کیو گیو۔ حفاظتی صورتحال نانہ یقینی بنان واسطے موصوف نے ضلع غے اندر تمام ایجنسیاں گا آپسی تال میل ور زور پایو ہے۔

Jammu Golf

جموں ٹوی گالف کورس جموں کشمیر اوپن 2024 کھیڈ مقابلوں واسطے تیار ہے۔ اور یہ مقابلہ جموں سیاحت غا ڈائریکٹوریٹ تے پی جی ٹی آئی غا سانجھا تال میل نال کرایا جارہیا ہیں۔ ان کھیڈ مقابلوں غی اچ سویرے تیں شروعات ہو چکی ہے۔ ان مقابلوں واسطے تقریباً 50 لکھ غا انعامات وی رکھیا گیا ہیں۔ اور اس سال بھارت کا گو لفر تیں علاوہ 6 ملکاں غا 11 بین القوامی کھلاڑی ان مقابلوں مانہ حصو لے رہیا ہیں۔

اس غے نال ہی خبراں غو یوہ بلیٹن ختم ہوو۔